

Munduko

III. Rugby Txapelketa

All Blacksek jokoa eta Hego Afrikak Kopa

Lacroix izan da puntugile nagusia 112rekin eta Zeelanda Berria gertatu da onena nazio arloan

A maitu berria den III. Mundialeko kuxtaren zerraila itxi aurretik, xehetasun eta jakingarri xume batzuk luzatu nahi genituzke. Liburu mardul bat idatz genezake, Hego Afrikan izan den kirol erakustaldi bikain honi buruz. Jakirik goxoenak, ordea, hobe pixkanaka irenstea, izugarrizko betekada hartu baino lehen. Hego Afrikak, hala ere, kontrakoa egin du. Apartheida amaitu 92an, taldea goitik behera aldatu, beste nazioen kontra norgehiagoka ugari jokatu eta hiru urteren buruan, munduko onenaren sari preziatua bereganatu.

KOLDO ALDUNTZIN / DONOSTIA


Ekainaren 24ko eguna, Hego Afrikako liburutik kuttuenean hizki handiz sartuko da, hiru urteko gau luze eta ilun batetik ateratzen ondoren. Johannesburgeko Ellis Park zelai berean, eta larunbatean aurrez aurre izan zuen Zeelanda Berriaren aurka hasi zuen, munduko onenak izan arteko kalbarioa. Jokalari eta entrenatzaile aldaketak, zerabilten Rugby gogorra eta zaharkituaren kritika mingarriak eta Munduko III. Kopa etxean jokatzearen presioa zamaratu behar izan du.

Naas Botha internazional ohiak eta mitiko bihurtu dena izan da aro berriaren hasierako kapitaina. Munduko Joko zabal-tzaile onena izan denak ederki laburtuko digu gertatu dena: «Ez zitzaidan burutik pasa ere egiten munduko txapelkunak izango ginenik. Bide luzea geneukan egin beharra, lehen izan ginenak berriro izateko, ahalik eta azkarren. Hutsetik hasi behar izan genuen. Talde indartsuenekin lehiatu behar izan dugu, txapeldun izan diren jokalariei hauek beharreko esperientzia har zezaten garaile izateko».

Naasek dio, All Blacksek Hego Afrikak hainbat aukera izan zituela finala irabazteko, baina, gaizki jokatu zutela uztartzeetan. Baloi onak jokatzeak aukera gehiago izan zituztela, baina, ezin izan zutela inoiz defentsa hautsi edo zultatu. Hortaz, -jarraitzen du Bothak- «guk ere merezi izan dugu garaipena, beraiek hainbat».

MUNDIALEKO ONENAK XIIIKO RUGBYAK TENTATUTA

Jakina aurretik ere, XIIIko Rugby profesionalekoek bat baino gehiago tentatuko zutela euren ligetan jokatzeak. Modalidade horretan-



Lomu zeelandarra izan da Mundialeko onena, joko ikusgarriarekin.

ko txapelketa indartsuenak Ingalaterran eta Australian daude. Mundialeko onena izan den Lomu edo selekzio bereko Little eta Konfied, Hego Afrikako Van der Westhuizen eta 1,99 m. eta 125 kilo dituen Kobus Wieseke jaso dituzte dagoeneko eskaintza interesgarriak.

Azken honengatik, 93.750.000 pezeta (3.750.000 libera) eskaini ditu Britainia Handiko Leeds taldeak, hiru urteko kontratoagatik. Lan gogorra egin beharko dute, beraz, Ingalaterrako, Hego Afrikako eta Zeelanda Berriko XVeko Rugbya zuzentzen ari direnek, aipaturiko jokalariek ospe egin ez dezaten, eta horrek, diruaz hitz egitera behartuko ditu, edo-eta txapelketa indartsuak antolatzen. Rupert Murdoch, Prentsako magnate australiarra, 10 urteko telebista eskubideak erosi ditu, arestian aipaturiko Hego Hemisferioko txapelketa eskaintzeko.

Joost Van der Westhuizen aukeratu dugu mele erdirik onena. Agian, Bachop zeelandarrak ere merezi zuen, baina, Northern Tansvaalekoak jokatu dituen bost partiduetan ondoko erakutsi ditu Rugbyrako dituen doai bikaina. Punturik lortu ez badu ere, 24 urterekin primeran gidatu du selekzioa. Brown All Blackseko harroinak ere Mundial ona burutu du, Eals australiarra, Stransky eta Kruger ego afrikarrak eta Lacroix frantziarrak bezalaxe.

IRITZIA

GERARD MURILLO
Rugbyko tekniko ohi

Inglaterrak jipoi galanta jaso du

Finaleko norgehiagoka bi hitzetan laburtuz, Hego Afrikak bere partidua egin zuen etxeko zaleen bultzadarekin. Izugarrizko prestakuntza fisikoa azaldu zuten, neurketaren amaiera arte burrutuz. All Blacksek ez zuten behar adina baloi irabazi alboko sakeetan. Aurrelarien arteko burrukan ere, uste baino ahulago aritu ziren. Ingalaterraren kontra esate baterako, nagusitu egin ziren aurrean, munduko aurrelaririk onenen aurrean.

Atzeko jokoa dagokionez, berriaz, ez ziren ondo kokatu. Aukerak sortu zituzten, baina, baloiak pasatzerakoan gaizki moldatu ziren. Era arraroan egin zituzten jokalarien saltoak eta Lomu ez zioten laguntza handirik eman. Pienaar hirugarren lerro afrikarra lehenago iristen zen bilketetara eta hori ez zen normala. Bestalde, aurreko egunetako indarra falta zitzaion. Beharbada, ostiralean jokalariek izan zuten disenteria gaisotasunak kalte egin zien, horregatik utzi zuen zelaiak Wilson hegala.

Pena eman dit Zeelanda Berriak ez irabaztea, nire gustoko Rugbya egiten baitu, erasokoa, alai eta dinamikoa. Pozten naiz hego afrikarrarekin, baina, ez zait atsegin euren jokoa, defentsan oinarritua, zelai okupatu eta gehiegizko ostikako jokoa darabilte; hori da egungo jokoa era.


Gainerako taldeei buruz zera esan behar, Ingalaterrak jipoi ederra jaso duela. Uste zuten joko horrekin jaun eta jabe izango zirela eta zaplazteko ederra eman zion Zeelanda Berriak, poztan naiz.

Eskoziak bere aldetik, txapelketa ona egin du. Egin zezakeen guztia egin du eta bera baino indartsuagoa den Zeelanda Berriak kanporatu zuen final-erdietan. Australiarrak saturatu egi ikusi ditut, II. Mundialek ona presio handia izan dute eta ez dute behar bezala erantzun. Bob Dwyer entrenatzaileak ere denbora luze egin du postuan. Frantziak finalerako txartela eskutan izan zuen, nahiz eta txapelketan zehar gauza handirik erakutsi ez.

Bestalde, nazio pobreak pobre izaten jarraituko dute. Badirudi hemendik aurrera diruak sekulako eragina izango duela Rugbyan, baina, ez nago oso seguru diruak espektakulua emango duenik. Taldeek ez galtzeko lehiatuko dute eta ez irabazteko. Horrek, ikusgarritasuna kenduko diolakoan nago.

Hego Hemisferioan sortu nahi duten txapelketa berria ondo etorriko zaio XVeko Rugbyari, han egiten baita Rugbyarik onena. Zoritxarrez, gutxi ikusi ahal izango dugu telebistaz, kate pribatu batek eskainiko duela baitirudi, Canal + antzeko baret.

EGUNKARIAREN III. MUNDIALEKO HAMABOSTEKO



Xehetasunak zenbakietan

JOKALARIAK	TALDEAK
PUNTUGILEAK 1. Lacroix (Fra) 112 puntu. 2. G. Hastings (Esk) 104. 3. Mehrkens (Z.B.) 84.	PUNTUGILEAK 1. Zeelanda Berria (327 puntu). 2. Frantzia (184). 3. Eskozia (179). 4. Ingalaterra (158).
ENTSEIUGILEAK 1. Lomu eta Ellis (Z.B.) 7 entseiu. 2. R. Underwood (Ing) eta G. Hastings (Esk) 5. 3. Richter eta Williams (H.A.) eta Lacroix (Fra) 4.	ENTSEIUGILEAK 1. Zeelanda Berria (41 entseiu). 2. Eskozia (20). 3. Frantzia (17). 4. Samoa (14).
JAURTITZAILEAK 1. Lacroix (Fra) 92 puntu. 2. Andrew (Ing), G. Hastings (Esk), Mehrkens (Z.B.) 79. 3. Stransky (H.A.) 56.	PUNTUAK OSTIKOZ 1. Zeelanda Berria (122 puntu). 2. Ingalaterra (103). 3. Frantzia (99). 4. Hego Afrika eta Eskozia (79).